

Inuusuttut nunanut allanut oqaatsinik ilinniariarlutik aallartartut amerlanerulernissaat anguniarlugu, Naalakkersuisut suliamik aallartitsinissamik peqquneqarnissaannik, Inatsisartut aalajangiiffigisassaattut siunnersuut.

(Inatsisartunut ilaasortamit Malik Berthelsenimit, Siumumeersumit saqqummiunneqartoq)

pillugu

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap

ISUMALIUTISSIISUTAA

Siunnersuutip aappassaaneerpeqarnerani saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Andreas Uldum, Demokraatit, siulittaasuugallartoq

Juliane Henningsen, Inuit Ataqatigiit

Ruth Heilmann, Siumut

Doris Jakobsen, Siumut

Jane Petersen, Inuit Ataqatigiit, Harald Biancomut, Inuit Ataqatigiinneersumut sinniisussaq

UKA2010-mi ulloq 7. oktober 2010-mi siullermeerinerup kingorna ataatsimiititaliap siunnersuut misissorpaa.

Siunnersuutip siunertaa

Inuusuttut oqaatsinik pisinnaasaqarnerulernissaat anguniarlugu nunanut allanut oqaatsinik ilinniariarlutik aallartartut amerlanerulernissaat periarfissaalissasoq siunnersuuteqartup siunnersuuteqarnermigut kissaatigaa. Kikkut nunanut allanukarsinnaanissaannut aningaasat aalajangiisooqataasariaqanngitsut siunnersuuteqartup immikkut oqaatigaa.

Siunnersuummi erseqqissumik oqaatigineqanngikkaluartoq kattuffiit AFS-itut ittut nunani allamiinnissanut atatillugu aaqqissuussinermut isumaginnittuussasut immiini ilaareerpoq. Tullit oqaasii inuussutissarsiutit arlallit eqqarsaatigalugit takornariaqarnermilu nunat tamat oqaasiit inissisimanerat siunnersuuteqartup immikkut isiginiarpaa.

Aningaasaqarneq eqqarsaatigalugu nunani allani ilinniarnernut tapiinerusalernissaq eqqarsaatigalugu efterskoliniitsitsisarnernut aningaasat atorneqartussat nassaarineqarsinnaassasut siunnersuuteqartoq naliliivoq. Assersuutigalugu AFS aqutigalugu efterskolertartut amerlane-

rit nunani allani atuarnissamik neqeroorfigisalerisigut siunnersuut piviusunngortinneqarsinnaasoq siunnersuuteqartup naatsorsuutigaa.

Siunnersuutip Inatsisartuni siullermeerneqarnera

Siunnersuut partiit tamarmik tunngaviatigut tapersorsorpaat nunanilu allani ilinniarnernut tapiissutinut maleruagassat ullumikkut innuttaasunut ataasiakkaanut paasiuminaannerujussuat uparuarneqarpoq.

Siunnersuut itigartitsissutigineqassasoq Naalakkersuisut inassutigaa. Tamannami pillugu aningaasaqarneq kisiat eqqarsaatigalugu inuusuttut efterskolimiinnissaminut nunanilu allani ilinniarnissaminut assigiimmik periarfissaqartitaasut Naalakkersuisut naliliipput.

Ataatsimiititaliap siunnersuummik suliarinninnera

Inuusuttut amerlanerusut nunani allani ilinniarnertik aqutigalugu allamiut oqaasiinik ilikkaqaqarnissamut periarfissinneqarnissaat Naalakkersuisut sulissutiginninnissaat pillugu siunnersuut partiinit tamanit tapersorsorneqarnera ataatsimiititaliap malugaa.

Uagut nunarsuarmioqataaleriartornitsinni innuttaasut kalaallisut oqaatsitta saniatigut allamiut oqaasii ikinnerpaamik ataatsit atorsinnaalissagivut siunnersuuteqartup siunnersuutaa ataatsimiititaliap isumaqataaffigaa. Taamatuttaaq tuluit oqaasii annertuumik pingaaruteqartup minnerunngitsumik nunat killeqarfii akimorlugit inuit amerlanerit atugarimmatigik ataatsimiititaliap siunnersuuteqartoq isumaqatigaat. Allamiut oqaasiinik atugaqarsinnaanginnertigut tamatuma aningaasarsiornermik ilinniarnermillu ineriartornitsinnik unikaallatsitsisuunnginnissaa inuiaqatigiittut uagutsinnut pingaaruteqarpoq. Tassunga atatillugu nunatsinni aatsitassarsiortoqalerpat sulisussatta pikkoriffigisassaattut piumasaqaatissavut tapiiffigisariaqanngilagut. Uuliasiornermik aatsitassarsiornermillu ingerlatseqatigiiffiit amerlanerit tuluit oqaasii sulinermi oqaatsit atugaraat sulisullu oqaatsinik taakkuninnga ilaatigut pisinnaasaqarnissaat ingerlatseqatigiiffiit naatsorsuutigisarpaat. Taamaattumik ilaatigut tuluit oqaasii ilinniarsinnaajumallugit inuusuttut amerlanerusut nunani allani ilinniartalernissaat tapersorsortariaqartoq ataatsimiititaliap isumaqarpoq. Periarfissaq taamaattoq massakku aningaasartuutaasussatut isigineqarsinnaasorinarpoq. Minnerunngitsumik inuusuttut nunani allani suli pisinnaasaqarne-rulersinnissaannik periarfissiinikkut inuiaqatigiit kalaallit ataatsimoorluta siunissatsinnut aningaasaliissuteqassasugut ataatsimiititaliap tunngaviatigut isumaqarpoq.

Aningaasaqarnikkut assigiiaanik takutitsisussanik misissuisoqarsimanagera. Naalakkersuisut misissuinerminni kisitsisit tunngavittut takussutissiaat nalilersussallugit ataatsimiititaliap periarfissaqarsimanngilaq. Taamaattorli Danmarkimi nunaniluunniit allani efterskolimiinneq apeqqutaatinnagu aningaasartuutit tamarmiusut kingunerisaannik inuusuttut ilaqutariinnit aningaasatigut atugarissaarfiunerusuneersuunerusut taamatut periarfissinneqaannassasut ataatsimiititaliap isumaqarpoq. Tamanna ataatsimiititaliap pissusissamisoorsorinngilaa aamma aningaasatigut tassani naligiinnngissuseq ilinniartitaanerit pillugit pilersaarummi tunngavittut i-

summamut tamarmiusumut naapertuutsinngitsoq ilinniarfitaanerillu inunnut ataasiakkaanut kisimi tunngatinnagit inuiaqatigiinnulli tamarmiusunut sammitinneqarnissaat qanoq pingaaruteqartigineranik naalakkersuinikkut oqariartuutitut naapertuutsinngitsutut ataatsimiititaliap isigaa. Tamatuma saniatigut inuusuttut nunani allani ilinniarfinni naleqquttuni pisinnaasaminik annertusaasinnaaneranunt atatillugu ilaqutariit ataasiakkaat aningaasaqarnikkut inissisi-manerat aallaaviusariaqanngitsoq ataatsimiititaliaq tunngaviatigut isumaqarpoq. Ataatsimut tamaat isigalugu tassungalu atatillugu inuit ataasiakkaat piginnaasaat inerisimassusiallu kiisa-lu ilinniarfiup tusaamaneqaataa pingaarnertut tunngaviusariaqarput.

Siunnersuutip uuma piviusunngortinneqarnissaanut suliaqarnermi nunani allani atuartunut tapiissutaasartut annertussusaasa angajoqqaat isertitaannut attumassuteqalersinnissaannut soorlu Kalaallit Nunaanni efterskolertunut tapiisarneq assigalugu periarfissanik misissueqqul-lugit Naalakkersuisut sakkortuumik Ataatsimiititaliamit kaammattorneqarput.

Ataatsimiititaliap inassuteqaatai

Siuliani oqaaseqaatit siullermeerinermilu oqaatigineqartut tunngavigalugit **ataatsimiititaliap isumaqatigiittup** siunnersuut **akuerineqassasoq** inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Andreas Uldum




Jane Petersen



Juliane Henningsen



Ruth Heilmann



Doris Jakobsen